

Gesetzesprojet – 20.12.2018

Wéi s du sécher weess, ginn d'Gesetzer an enger parlamentarescher Demokratie am Parlament decidéiert. Zu Lëtzebuerg ass dat d'Chamber. D'Deputéiert stëmmen also iwwer déi proposéiert Gesetzer of. Wann s du eis aner Podcasten zum Parlament an zur Regierung gelauschert hues, da weess du, dass souwuel d'Parlament selwer wéi och d'Regierung kënnen e Gesetz virschloen, dat dann am Parlament gestëmmt gëtt. E Gesetz, dat vum Parlament virgeschloe gouf, gëtt zu Lëtzebuerg «Proposition de loi» genannt. Wann d'Gesetz vun der Regierung virgeschloe gouf, da schwätzt een zu Lëtzebuerg vun engem «Projet de loi» oder Gesetzesprojet. Vu dass an der Praxis déi meescht Gesetzer vun der Regierung proposéiert ginn, héiert ee meeschtens och vu Gesetzesprojeten.

D'Chamber huet eng Rei Kommissiounen, an deenen Deputéierten aus all Partei vertruede sinn a wou bestëmmt Themeberäicher behandelt ginn, wéi zum Beispill Landwirtschaft oder Finanzen. E Gesetzesprojet gëtt a senger jeeweileger Chamberkommissioun diskutéiert a deemno wéi verännert. Dobäi gëtt ënner anerem d'Meenung, de sougenannten Avis vum Staatsrot berücksichtegt.

De Staatsrot kontrolléiert, ob de Gesetzesprojet géint keen anerert Gesetz verstéisst. Och mussen d'Beruffskummeren ëm hir Meenung gefrot ginn, wann hir Membere vum Gesetzesprojet betraff sinn. D'Beruffskummere verrieden d'Interesse vun hire Memberen. Sou vertritt z.B. d'Chambre des Salariés d'Interesse vun den Ugestellten.

Soubal d'Aarbecht an der Chamberkommissioun ofgeschloss ass, kann e Gesetzesprojet an enger sougenannter Pleniërsëtzung gestëmmt ginn. Fir dass e Gesetzesprojet ugeholl ka ginn, muss d'Majoritéit vun den Deputéierten dofir stëmmen. Zu Lëtzebuerg sinn dat mindestens 31 Deputéierten an der Chamber.

Iert d'Deputéierten ofstëmmen, ob si de Gesetzesprojet unhuelen oder ofleenen, gëtt et eng Debatt iwwer de Gesetzesprojet tëscht den Deputéierten. Si gëtt vum Chamberspresident oder der Chamberspresidentin moderéiert. D'Deputéierte kënnen dann och nach Ännerungen um Gesetzesprojet virhuelen, wat an der Praxis awer éischer seelen de Fall ass.

Während dëser Debatt kënn als éischer de sougenannte Rapporteur oder d'Rapporteuse zu Wuert. Si oder hie mécht de Rapport ënnert anerem doriwwer, wat an der Kommissioun zum Gesetzesprojet geschafft gouf a wat de Staatsrot an aner Acteuren dozou gesot hunn. Duerno ergreift een Deputéierte vun all Partei d'Wuert, fir d'Meenung vun der Parteifraktioun zum Gesetzesprojet z'erklären. Och de Minister, deen d'Gesetz betrëfft, ergreift bei esou enger Debatt an der Regel d'Wuert.

D'Sëtzungen, wou d'Gesetzesprojeten debattéiert a gestëmmt ginn, sinn ëffentlech a ginn esouguer live op der Tëlee an um Internetsite vun der Chamber iwwerdroen. Falls et dech also interesséiert, eng Kéier matzëerliewen, wéi e Gesetzesprojet gestëmmt gëtt, kanns du dir dat jo

POLITIKLEXIKON



eng Kéier ukucken. Et ass esouguer méiglech, an der Chamber selwer op der Zuschauertribün nozelauschten.